

東鹿五志合集

興州胡
發題



地130.83

32.1

1-8

部五

東鹿五志
合刊

丁丑冬十月

吳興州胡

登頓



東鹿五志合刊

中華
民國
廿六
年

石明先生

北京晨報社張勝霄呈贈

東鹿縣五志合刊序

天命靡常而有常人事有亂而不亂上有燔書之令則下有孔壁之經時有五季之亂則人有石室之藏默察天人之際萬事萬物大都然矣古今來治亂亦夥矣而文武方策至今猶存者當夫放失喪亂之秋必有賢人君子防之於未然繼之於將絕若存若亡以待來者之求夫而後能綱維宇宙於不弊孰綱維是所賴有心人之所爲矣今歲丁丑余獲交東鹿謝君寧一博學治古文多著述尤致力於其縣志以搜訪修撰自任者有年矣考東鹿之有志創於明代天順復有成化正德嘉靖隆慶之續修是曰明五志清代則有康熙乾隆嘉慶同治光緒續修之清五志綜五百年而有十志不可謂不多然天

東鹿五志合彙

序

一

啟中縣治沒於溥茫明五志蓋盡亡於水清五志流傳絕少同治志尤爲絕無寧一徵求二十載竟得全獲五志完而無闕且將繼此而自修新志焉今歲春桐城姚侯凌九來令東鹿首以修志爲亟謀之邑紳知寧一既得五本欲修新志且有史才詢謀僉同舉之以當茲任顧謂茲事體大非可速成而姚侯顧念時艱意弗可再緩以新志既弗可急就舊志亦人間孤本請於寧一欲先以舊志刊印千部以資流傳寧一慨賢宰之同心喜素願之克遂力促其成并自校讐於是以前季冬之月刊印完成而絕無僅有之清本五志賴以不亡名之曰東鹿五志合彙都五十二卷此姚侯之力寧一之功相得以成者也雖然苟非寧一求之二十載治之有素則雖有賢宰之力其將何

施吾故曰天下事所賴有心人矣其尤難者當寧一手校刊印適值盛夏蘆溝之變戰火圍城河北大震舊都人士方遷徙流播盲求樂土十室九虛寧一獨杜門安居不問時事率其妻子門下坐擁百城考經披史日以繼夜以董斯役飛軍渡空礮彈星殞弗顧也如是者凡五閱月而河北淪陷晉魯江淮俱爲焦土四海鼎沸民不遑處而寧一校讐刊印之功以竟豈不曰是書爲數百年鄉邦文獻所係舊本旣難求賢宰尤難得帶甲滿地旦夕莫測天下事惟至愈不可爲愈當力任其難哉是五志彙成寧一功非禹下矣書成索序於余余則更有進於寧一者同治志在中興之後記練勇禦捻特詳光緒志以時際承平事略書簡自後五十年河北爲畿輔之區中經鼎革遜

束鹿五志合彙

序

二二

國以來軍閥迭爲起仆兵爭不息內禍外患於今爲烈願寧一秉其直筆展其素抱據事直書更爲新志以繼此合彙之後使此五十年沿革變遷文獻掌故咸有統緒而弗失墜世變亦亟矣續緒之業稍縱即逝寧一網羅放失搜輯舊聞已二十載及今爲之事半功倍舊志旣得繼絕新志復得觀成則不朽之業咸成於有心人之手使河北諸縣聞風興起使後世子孫弗忘今日寧一其有意乎其有意乎丁丑除夕江東楊圻撰序

方志者郡邑之史乘也欲溯疆里之沿革考城郭廨舍之建置察物產之豐嗇與夫人士司牧之賢否舍方志靡得而窺焉束鹿自兩漢列入侯國唐代因以名縣垂及明清千餘年未之或改而方志之始

肇自明天順迄於隆慶續修者四及清初康熙至光緒亦先後續修者五噫以蕞爾一邑五百餘歲中成書者十其人士之愛護鄉里敬恭桑梓者可不謂之美且備乎惟閎世既久傳本至稀明志既不可蹤跡清代諸志亦珍同祕籍稀若星鳳而吾友謝君邁度卒以數十年之力俱收而並蓄之同邑人士以君蒐香之勤且邑中方擬續修新志正待參稽爰合請於縣君請以君之所得付之剞劂且不自珍祕付之手民廣其流布當機聲震天衝車沸地之日君獨居斗室中與良妻稚子躬任尋行數墨之勞而不恤此其敬恭之誠與淵涵之量非所謂悲歌慷慨之士邪憶三十年前予與君同邑李訪漁太史游習聞君賢而好學人事卒卒苦不相見十餘年前軍人方構兵予

日往故宫繙四庫書忽與君相值互道姓字懽若平生自是以還時承以詩文見示今年夏戰事歛起視十餘年前之兵事且十百倍之不謂垂老之年忽遭亡國之痛帝王之道將盡於旦夕中懷悲憤攬卷無懽忽得君書乃知抱殘守闕之彥正自有人推此愛重鄉土之心其不忍國家之淪胥一旦得所假手知必有投筆而起者矣然則君之合刊此志也其將爲天祿之祕籍歟抑爲胥井之心史歟未可知已民國第一丁丑冬十有一月貴陽邢端

方志之學隸在乙部本以附庸蔚爲大國近世社會之演變日劇事物之累積日繁其有關輯錄在在宜入志乘以爲史資者尤甚夥願誠非舊時義例所能盡焉有清章實齋氏集方志學之大成者也既

創方志立三書之議又於方州議立志科所舉乘二便盡三長去五難除八忌立四體以歸四要諸論固已詳哉言之至今日治是學者益復糅合新舊融通中外盡化裁以趨實用非僅爲一州一邑示觀美如章氏所譏已也然吾觀前人修志每存舊書序跋其尤著者如雍正江浦縣志首修志系考以記始末乾隆江蘇清河縣志附著康熙諸志凡例並舊志之善者仍之章氏自修諸志且爲前志特編列傳是不惟大輅椎輪在義應爾抑前事不忘損益可知百世如一日也東鹿謝君邁度倡議續其邑志者有年尤以訪佚自任蓋東鹿歷明清二代各有五志明志久沒清五志僅傳其三歷年摺訪始得康熙同治二志錄成副本今以所纂新志未就先事合印清志用免放

失會自夏秋以來時變驟起倉皇震撼之際獨能閉戶校讎五閱月始蒇事其困心茹志誠有不可及者在昔孫淵如氏序沈刻雲間志曰今世修志無善作好手不如刻古志於前以後來事蹟續之阮文達公序儀徵志亦云欲得新志之善必須存留舊志二家皆一代通儒深於是學者其言與章氏爲前志作傳之旨若合符契邁度今茲克存舊志異日踵成新志其皆有取於斯歟因憶民國九年夏武進唐企林知事肯來宰吾邑倡修新志力屬愚爲總纂趙君雲書爲提調其任分纂者在京爲趙君廷珍曹君葆珣李君楷榮王君篤弼劉君繼勳在邑爲周君楨耿君璋劉君述茲張君志瞻曹君偉臣合十人又任八區採訪百四十員集議公決先事採訪續定義例愚復摻

得清光緒桐鄉間蔡鶴君師壽臻續志寫本錄副待梓迺在舊十數年間邑宰屢易分纂諸君頗有下世者採訪成稿未獲寸楮創制起例曷從借手徒深感喟而已承平如乾嘉鴻碩如章氏從事諸志譏撓齟齬尙且備嘗今當戎馬倥傯邁度得就其功之半寧非至幸而愚益滋愧於無窮矣民國二十有六年十二月武清郭家聲撰

河北州縣之志昉自明代嘉隆以後者十居八九而束鹿明志獨先于它縣明代縣志賡續多者不過二三束鹿自天順以還迄于隆慶凡五修焉不謂不多矣顧天崇以後諸本無一存者洎乎清代自康熙以迄光緒續修又有五志然亦存亡各半邑子謝君邁度究心文獻窮搜於北京各圖書館卒能訪獲缺佚使缺而復完可謂一邑之

束鹿五志合彙

序

五

幸邁度欲網羅舊聞輯爲善本以不肯率爾操觚不能以速成相迫也於是邑之士紳公議合刊五志以備一方之掌故刻成問序于余余惟方志者一邑政教文化之所寄所關非不重也然苟非其人則弁陋鄙倍罕足行遠如曆書然時過則捐邦人不重視之新志方出舊已覆瓿以故典籍之中以方志爲最濫宋元以來僅存數本者其不以此歟果其典雅詳贍足資法守後世且樂傳之況于竝時異地且什襲之況于當境彼以著之新舊爲重輕者皆俗論也今五志雖未徧讀而爲時數百年一朝之故實悉具于斯較求備于一書者亦足多矣況其中不乏善本乎吾知此刻一出它縣必有仿而行之者民國丁丑仲冬鹽山賈恩紱序

寧一居士既以撰修東鹿新志自任復蒐集清代續刊五志重印合訂名曰東鹿五志合刊而自兼校讐冀以廣流傳也五志版籍存者僅三其二則散佚久矣居士積二十年辛勞朝蒐暮索近諮遠諏卒於北京國立圖書館後先得之其用心於縣志已云苦已矧是時蘆溝變起海內風塵兵氣凌駕乎九霄殺聲騰沸於三輔以故逃者狂奔居者惴伏而居士閉門著述依舊風騷目擊手披無間昏曉其卓爾獨邁之精神翛然自得之意志爲何如哉雖然五志之刊已往之東鹿史也其治亂興衰之迹比量今日又何如乎予鄉與東鹿接壤風聞此日深東各縣已成萑苻荆棘之區縣治負責無人小民何所託命死者狼藉生者呻吟里絕炊煙家徒四壁其或避地遠方匿跡

東鹿五志合刊

序

六

巖谷遲回審顧欲歸而不敢驟歸者又不知其凡幾嗟乎茫茫浩劫數等河沙遙望家山愁腸寸斷寧一愛鄉憂國恒爲人先然則校讐之暇檢閱之餘故鄉慘狀其亦反映於眼簾之下激盪於胸臆之中乎

丁丑季冬深縣張恩綬序於北京之二柳堂

世不當有無用之書有備用之書有致用之書凡攷定訛謬補綴遺失如疆域物產沿革興替非欲直用其說以施政立教也然而施政立教者必察其書而後政教有所依據故曰備用之書若夫戶口登耗風俗隆替吏治良窳則其書乃政教成壞之驗作者又慮人不得其領要也乃作爲叙論著其善敗之由史記漢書馬氏通攷其最善

者也故曰致用之書方志者兼備用致用而爲一書者也致用之道貴在因時以救敗方志之作可攷見者自唐迄今千有餘載世變不同其具救敗之說者亦必因時以適變此必然之勢也自攷據之學盛行而片辭隻字益確益精於是備用之書益富乃近百年中專攷求名物訓詁者不復留心實用及近世危亡之際亦知訓詁音聲名物器數於國政民俗無處可施也乃竟肆其狂慧謂講學專爲攷古非用以圖治學自學國事自國事二者不宜牽涉古人謂經術治國者乃僞說欺人實無其事其和之者皆被其愚者也經術且然況它書乎噫是說也蓋不自今始今則一倡百和矣可怪矣哉夫讀書不求實用此我不求耳乃竟謂古書非爲致用何哉今夫郡邑之志所

載者小事也而戶口之登耗風俗之隆替吏治之良窳儻各善其塗而救其敗則土地人民不已治乎一邑之救敗且如此況若通攷通典諸大政悉其門類而皆善之則舉國不已濟於盛美乎故自馬班以下作者莫不揭六經要義各冠其篇立爲致用之準一郡一邑之志莫能外也若不期致用乃并待用於人而宿爲備攷者且忘其義焉則所謂國學者乃祇爲拮據以著書耳我能是彼不能是則我乃勝彼是直以著書釣取浮名而古今載籍亦祇玩好之具角逐於爭勝之場而已文教之實亡而種族隨之於戲此亡國滅種之道也東鹿謝君邁度憂鬱著書作爲東鹿新志今未脫稿而先校讐舊志自康熙迄光緒前後五志二百餘年事蹟所謂事變漸殊而善敗之故

盡寄其中者也茲將付梓介吾友張君澤餘徵序於余因舉備用致用之說以就正焉

民國二十七年二月四日任邱劉培極序

吾友束鹿謝子邁杜爲交四十年矣善詩而能文通今而好古攷其所有跡其所至信吾黨之雄雋彪彪乎不藉史筆足以自垂者也然學問之道與年爲移近以詩文小技不足以終焉溺也則有新志之剏製志書宏業不可以卒然就也故有舊志之合彙舊志者五志也束鹿有志以來爲本凡十曰天順曰成化曰正德曰嘉靖曰隆慶是爲明本五志曰康熙曰乾隆曰嘉慶曰同治曰光緒是爲清本五志今所彙者所謂清本者也姚君凌九來長束鹿謀於縣之職紳重印

束鹿五志合彙

序

八

五志以廣流傳謝子身任校讐將付印徵序於余余謂志者史之流也其業至鉅而爲之也至難其體在民而其用之也資治唯其然也叙事貴要而不可以詞騁也備數尙審而不可以概括也調風明法尊後王而不可以古拘也是以讀其書者可以窺見當時國勢之強弱民心之向離物力之盈虛思想之通塞文化風俗之高下隆污爲政者得用以資治焉馬史之所謂善叙事班志之所以獨立千古其不以此歟魏晉以降政不勤民國多諱事執筆之士或略焉而不爲或爲焉而不盡馳騁於詞翰而避去本要張皇於舊聞而不錄現世流風所傳遂若定例書有國省郡縣之別事有輕重大小之分而其空疏闕略無裨當世何其紛紛一轍也土地戶口國本也不能詳其

數出產賦稅國富也不能舉其科思想風化國之精神學校士生國之基幹或略焉或擯焉繼之獵而去其精末之蒐而遺其本豈其知之弗若哉不忠之過也蓋採訪者避難而就易纂述者閉戶而造車因果相乘遂使書與事脫國與民離夫書與事脫書將何徵國與民離國誰與立嗚呼五胡亂之元清吞之今日愈變而愈烈也又何怪乎故吾謂傳志之道與其工於文不若核於事與其究乎古毋寧詳乎今誠以志書者所以資治者也事核則有據今詳則易行志書之所以難爲與其有用而可貴者胥是在矣不此之察而覆轍是循縱使篇篇成文處處是古亦所謂翰墨徒具拘泥鮮通已耳其於實事求是也奚取焉邁杜學有根柢遭國家非常之變發胸中不世之奇

採訪必精纂述必審取吾所謂國本國富者諸大端廣收而慎選刪僞而要真綜物經事無慙乎古人責實循名有資於當世他日新志告成俾有識之士謂之爲實錄謂之爲善叙事此亦大丈夫報國敬梓之快事也擬之校栞舊志而保存之者其爲功效不尤壯美矣哉冀縣張鏡寰叔平譔時中華民國二十有七年二月也

昔光緒乙巳安陽張侯鳳臺知東鹿適奉令采志鄉土余以不才備位編輯六人分纂四月成書匪唯載籍所載未遑深攷而本縣舊志獨有嘉慶己未李侯符清志乾隆壬午李侯文耀志竟未獲見竊疑束鹿志書自明訖清歷五百餘載萬不能僅乾嘉二本然訪之於薦紳故舊有年明志固未前聞清志亦無他本今歲仲冬邑人謝子邁

度以校印東鹿五志合刊見示並徵序言五志者兩李志外又得康熙辛亥劉侯崑志同治壬申宋侯陳壽志合鄉土志而爲五也讀劉志舊序縣之有志始於有明訓導連江翁解元賓撰者曰天順本武定康司訓紹儒續者曰成化本教諭武定夏孝廉振閩鄉教諭邑舉人焦讓合續者曰正德本皆寫本無版刻正德甲戌忻州閩侯濟始續而壽諸策梨平定白侯鑑續者曰嘉靖本河南按察司兵備僉事邑進士賈衡撰魚臺武侯時杰刻者曰隆慶本循是而言明清二代志各有五向余之疑爲不虛矣惜天啓二年縣沒滹沱明本五志悉果河伯之腹清本五志雖無水厄康熙板早已銷毀同治志絕少傳流賴謝子苦心訪求缺而復全嗚呼清本五志之不亡蓋亦幸矣自

歲紀辛酉謝子倡議續修縣志即慨然以網羅放失蒐討故實爲務先之本縣各村訪金拓石繼之北京圖書館徵文攷獻起壬戌至乙亥歷十有四載卷帙最繁之四庫全書實手繙其半元明秘本四庫未收及方志輿地之書尙不與焉聞所得故實幾倍五志其所攷訂改鹿城曰東鹿爲唐天寶十五載三月十八日宋楊闢與曾鞏同見稱於歐陽文忠五代張允新史不載縣籍元相耿煥元史不爲立傳明舊治書院曰育賢駙馬都尉曰王增遷盧氏之耿爲平定舉人耿綱非東鹿貢生耿綱復於明本實錄錄得王忠毅王毅愍賈司空王安簡便殿召對敷奏軍機政要六百三十餘事此皆清本五志所不載且可補訂正史之缺謬者也而庫池之文曰滹沱田叔之籍曰陸

城貫侯鄔侯史漢異同鄔鄔陸成安國博陸割置省易尤鑿鑿有據
沾沾自喜此則讀書深得有功史漢爲歷來注史者所未道非僅繫
一縣之沿革也鹽山新志因攷碣石蜚聲士林謝子所攷漢縣四五
異日新志告成行將與鹽山志同爲治方志者所祖述矣民國二十
六年春姚侯凌九來長束鹿諗知謝子攷徵典籍不憚煩勞摺摭故
實又頗夥願乃延爲總纂撰修新志并在北京開館以便易於取材
庶得尅期成書又以清本五志蒐集不易複印千部分佈各鄉於是
撰新刊舊并舉兼程若姚侯者可謂關心文獻知所先務之賢尹矣
唯開館未及匝月忽有蘆溝之變礮火隆隆中謝子躬任校讐閱五
月而五志成凡八冊一帙五十有二卷嗟乎事之成敗蓋難逆料刊

舊撰新倡自姚侯及五志殺青而姚侯已解職他去舊志之成目不
及見矣新志之輟耳亦弗聞矣謝子豪爽有奇氣非其人不友而獨
昵於余齒少於余呼余爲兄初安陽張侯之爲束鹿也覃敷新政庶
績咸熙傳旨嘉獎班式邦畿曷克臻此舉賢任知矯矯謝子侯所羅
致創警勸學咸賴其力其教練巡警也上堂講警律下堂授步武其
會攷各鄉鄉校也設問課殿最操體分甲乙日未出而作日入猶不
息往往終日一食凡彼職紳皆有薪給而謝子獨一錢不取爾時余
以編志鄉土滯留縣治濟濟多士詩酒笑語惜未三葦張侯以卓異
擢守興京謝子亦倦而歸里民國以來謝子選爲省議會議士而余
則周旋於縣鄉之間欲有造於隣閭未幾謝子以不帝袁氏見逐於

省議會遂憤而服賈余亦落落寡合動爲人忌乃逃隱於市楊惲所謂糴賤販貴賈豎汗辱身親行之謝子則以任用非人折閱至鉅鬻田賣宅不償其失甚至妻孥交謫稱貧乏術猶強顏自豪曰吾方汲汲事撰述誰復屑屑計鹽米士死於貧比比皆是吾久處困獨得不死厥賴撰志有以羈縻於戲詩所謂勉從事不敢言勞論語所謂造次必於是顛沛必於是吾於謝子之修志得庶幾而見之焉張侯政迹謝子學行蓋所謂質之國人皆曰可垂諸方志而弗媿余故具論其事綴諸五志序末且悲東鹿新志又輟於垂成蹉跎齟齬頗若天故厄之者謝子原名銘勛五十五歲後慨身世多艱覺人間世唯道爲安得一以寧慕高僧衛道安之爲人遂改名道安字曰寧一中

華民國念有六年夏建丁丑冬十一月朔後五日縣人魏錫綸壽岑氏識於津門

宋元以來著述之盛莫盛於方志文辭之濫亦莫濫於方志是以方志雖多可讀者少以余耳目所接於宋得羅願新安談鑰吳興於明得韓汝慶朝邑康海武功於清得陸隴其靈壽孫星衍醴泉洪亮吉登封孫洪合撰澄城章學誠永清魯九皋新城魯一同邳州崔述大名吳汝綸深州風土記最爲晚出而最知名其置域河渠賦役兵事官制人譜諸篇立言之雅選材之精直與遷史固書抗禮分庭彼區區以方志爲學者豈足以辨此哉方志至深州金聲而玉振之矣嘗觀諸志康韓以簡賅勝孫洪以淵博勝二魯以文章勝章氏以義例

勝吳氏則詞章攷据兩勝餘者皆以地方人記地方事勝大名武功固無論矣而陸氏靈壽實出邑人傳維樸之手由是言之撰志之賴於地方人士顧不重且大歟唐書地志先天二年割鹿城饒陽安平置深州據此則深未置州之前深之風土半爲鹿城風土至今鹿深之交田廬雜錯余籍於鹿居則近深鹿與深蓋莊子所謂汎汎乎無所畛域者焉然自唐天寶改鹿城曰束鹿元至元以束鹿隸祁州束鹿人文反不得附吳書以傳此束鹿之不幸言之不勝太息者也余不自量嘗思繼吳氏而爲束鹿風土記宦遊豫雍簿書鮮暇及懸車歸來欲從事於撰述而年已七十無復當年之餘勇矣一邑之大豈少同志縣志之撰奚必自我往余聽鼓邠州聞謝子邁度議撰縣志

粗知其略不能詳也又數年余客北京訪邁度於逆旅親見其拮据張皇日赴故宮圖書館孜孜焉摛檢遺聞繙取圖書自宋元祕籍乾隆四庫輿地方志叢刻別集靡不寓目偶有所得操筆立書一若淘沙澄金入海探珠人多笑其迂濶余獨服其堅苦殆古之所謂畏友其眼福之富又余所深妬矣迹其所獲滹沱之文潯當從洹鄆鄆安國省置沿革贊鄆清都侯封姓名田叔涇城爲陸城之譌霍光博陸析博平陸城以置此皆經史異同治地理攷據者所兢兢且爲顧祖禹洪亮吉齊召南汪遠孫張錫瑜錢大昕大昭錢坫何炳諸家疏而未攷攷而未審至邁度而始得論定者也其他得歐陽文忠送和楊關詩王荊公撰關父文詡墓誌原本明代實錄錄得忠毅毅愍二王

公奏疏召問若干言明清間人專集得二王公傳狀墓誌若干通以及歷代遺聞若干事鄉之先哲若干人遂錄已亡劉宋二志訪拓一縣殘碑斷碣此又鄉邦之榮邑乘之光爲清本五志絕未道及至邁度而始得著聞者也遇邁度如斯之勤得故實若彼之多東鹿新志久未成書者此固由於歷任令長庸俗不知文獻而地方職紳畏難不肯助理蓋亦不得辭其咎焉丁丑孟春姚侯凌九來長東鹿詢知新志促迫不能草定清本五志不謀流傳終必散亡於是官紳諧謀撰新刊舊一任邁度且開館北京以便易於纂述校讐清本五志者康熙乾隆嘉慶同治光緒五朝遞撰之志也郡縣方志大氏甲得乙續則甲廢及丙續乙或丙得丁繼則乙丙俱廢求一原有數志至今

猶存如吾縣所謂五志者誠不易得彙一代五志合刊印行若吾縣今茲之役者尤爲創舉此志一出起而效之者當不少也五志合刊校印將畢邁度過余曰新志惜又中輟舊志幸得告成子縣人也願得一言爲序義之所在老易敢辭清代五志某本某撰某略某詳某尙存某已亡亡而如何復全共印若干部都爲若干卷皆詳於邁度序中余不多言爲述邁度用力之專得材之夥以撰新視刊舊尤爲重要且冀吾縣薦紳群起而謀完斯盛業俾謝氏新志早觀厥成蓋不禁低徊鄉往如孟子所謂不知足之蹈之手之舞之云
中華民國二十有七年夏建戌寅仲春花朝邑人張俊英子林甫序於北京

康熙保定府邢州東鹿縣志卷首

序文

古者列國皆有史即今郡邑之志也有志而後太史有所考據彙而纂之以成一代之史志顧不重歟非特此也凡山川之險易土田之肥瘠賦役之重輕莫不彙列後之人得以因革修救於其間則志也而政具焉風俗之貞淫禮教之興廢與夫豐功偉烈忠孝節義莫不備載後之人有所感發而興起則志也而教具焉志顧不重歟然而其事貴詳其文貴核不核則失真不詳則多漏以今日而欲千百載之間瞭若指掌甚矣志之難也而東鹿之志爲尤難蓋他邑有故籍可稽而東邑舊治明天啟年爲漣沱衝決故志遂淪巨浸中自是兵燹數十年來鋤化爲劍戟幾不知文獻爲何事間有志於斯者亦謙讓而未遑也及南昌劉子宰是邑政清訟簡之後慨然起而修明之僅得一二殘編於村落之民舍乃能旁蒐博採不踰年以成茲鉅典其遠者寧闕恐不核則失真也近者多悉恐不詳則或漏也豈非所見所聞所傳聞之有異乎各出心裁表章論斷嗚呼修云乎哉幾作之也

康熙東鹿縣志

卷首

序文

而後是書與東邑共垂不朽矣雖籍邑中諸君子相與有成苟非劉子毅然奮興亦烏能使已湮之典一旦炳煥乃爾乎嗣後宰是邑者覽斯志而得以因革修救焉居是邑者覽斯志而得以感發興起焉則劉子不獨治一時之東邑已也且也聖天子右文致治纂修故牒異時命輶軒之使遐采風謠以成一代史亦於斯志有攸賴焉康熙十一年歲次壬子孟夏朔日賜進士出身管理直隸錢穀守道副使前內國史院侍讀三韓丁思孔書於保陽署中之嘉樹軒

尙書載禹貢周禮列職方是志之所由昉乎漢龍門志天文一書後不聞繼作者蓋以史遷世職太史氏得以掌故備傳其實星經宿緯以至晦明會蝕災祥禱應皆天子法天欽大之學故郡國不敢與焉惟孟堅地里志出嗣是而後郡有志邑有乘俱名之曰志輶軒過而采風悉得囊亟以獻其中風土形勝田賦戶版遺芳往蹟靡不畢具俾披卷一過此都之風尚如在指顧間志顧不綦重哉東鹿保之南鄆屬邑也恒山西亘漳水南遶漣沱貫乎中所稱沃衍上土人文卓焉稱冠者自故明天啟間舊城幾圯於河患一切版籍半

